

## Kapítulo 1

# INTRODUKSHON

Dos kabayero hóben estranhero, bistí atraktivo ku kamisa blanku bon striká i dashi, ta presentá na porta di bo kas. Nan ta parse hende inteligente i desente. Nan por ta miembro di un sekta? Un tiki

deskonfiá, bo ta habri porta. Nan ta introdusí nan mes komo miembro di e "Iglesia di Hesukristu di e Santunan di e Deláster Dianan." Loke nan ta papia, segun bo ta kòrda ta kuadra ku tur loke bo a tende tokante Hesus desde tempu ku bo tabata mucha. Bo intranquilidat ta kuminsa disparsé. Un religion ku un nòmber asina tradishonal i siñansa asina bíbliko lo mester ta bon. Pero ken nan ta?

Desde komienso di e religion aki, mihó konosí komo iglesia mormon, dia 6 di aprel 1830, nan miembresia a krese ku un rapides asombrante. A dura 117 aña (1830-1947) pa yega na un total di un mion miembro. Diestres aña despues nan a alkansá dos mion. Den e próksimo tres dékada nan kresementu tabata kasi inkreibel. Pa aña 1989 nan a revelá ku nan tin un total di 7,3 mion miembro.<sup>1</sup> Nan meta ta pa yega na un kantidat di entre 70-100 mion miembro promé ku aña 2035. Pa akomodá e kresementu tan rápido, nan ta konstruí dos kapèl mormon kada dia rònt mundu.

Un di e faktornan prinsipal ku a kousa e kresementu fenomenal ta debí ku nan ta enkurashá nan hóbennan (hòmber di 19 aña, i muhé di 21 aña) pa dediká un aña i mei pa promové siñansa mormon komo mishonero na otro parti di nan propio pais òf otro nashon. Kasi un tersera parti di e hóbennan maskulino entre 19 pa 25 aña ta kumpli ku e deber aki. E mucha muhénan no ta enkurashá asina tantu pa hasi e trabou aki. Maske nan tin ku sostené nan mes òf risibí kontribushonnan di nan famia òf amigunan pa kubri nan gastunan, tòg kada dos siman mas ku 70 hóben ta sali komo mishonero. Na aña 1989 nan tabatin 39.739 mishonero aktivo rònt mundu, i a anunsiá ku 318.940 hende a konbertí i a batisá den nan religion. Hopi di e kresementu a tuma lugá na e 19 pais Latino Amerika, unda mormonnan ta aktivo. Na aña 1989 tabatin 1,98 mion mormon na Latino Amerika, espesialmente na Mèksiko, Brazil, Chile, Peru, Argentina i Guatemala.<sup>2</sup> I mormonismo ta krese na nos islanan.

Mormonnan ta eksigí di tur nan miembronan pa duna nan dèsimu na nan iglesia.<sup>3</sup> Tambe nan ta enkurashá "ofrendanan di ayuno"—salta dos kuminda un djadumingu pa luna i duna un suma di balor igual ku dos kuminda pa yuda e poberman. Komo resultado iglesia mormon ta sumamente riku. E Iglesia di Hesukristo di e Santunan di e Deláster Dianan no ta publiká informashon tokante nan entrada. Sinembargu Prensa Asosiada a kalkulá na aña 1975 ku entrada di iglesia mormon a surpasá \$3 mion *kada dia*. Esaki ta for di e dèsimu so. Tambe nan a revelá ku mormonnan ta doño di propiedat i indústria ku balor di \$2 bion, poniendo nan den e kategoria di e 50 negoshinan mas riku na Merka.<sup>4</sup> Na sèptèmber di aña 1991, un estudio di parti di e korant *The Arizona Republic* a bin haña sa ku iglesia mormon ta doño di terenonan

ku tin balor total di mas ku \$1 bion prinsipalmente na estadonan di Utah, Arizona, California, i Florida. Inkluí den esaki tin finkanán grandísimo; un di grandura di 81.345 hèktar na estadonan di Utah i Wyoming.<sup>5</sup> Rikesa di e Iglesia di Santunan di e Deláster Dianan ta reflehá den nan kapèlnan i espesialmente nan tèmpelnan. Nan kapèlnan en general ta masha bunita i nan tèmpelnan, ku ta prohibí pa "paganonan" (hende ku no ta mormon) drenta, ta luhoso.

Mormonnan ta duna impreshon ku nan ta hende moral, hospitabel, ta traha duru, deboto na nan famia (ku en general tin un famia grandi debí ku nan ta kontra uso di antikonseptivo). Nan ta perkurá pa nan kurpa, no ta usa tabaku, alkohol, ni tampoko kòfi, te, ni refresku ku ta kontené kafeina, manera Pepsi-Cola.

Iglesia mormon tin hopi atenshon pa nan hóbennan, ku hopi aktividat pa nan: deporte, drama, músika, baile (inisiá ku orashon i kousurá ku un himno), èts. Nan ta enfatisá edukashon, i ta doño di e universidat privá mas grandi na Merka, Brigham Young University na estado di Utah ku 27.000 studiante. Nan kursonan di "seminario" i "instituto" ta inkluí mas ku 320.000 studiante. Hóbennan mormon ta konosí komo bon studiante. Kriminalidat entre hóbennan mormon ta hopi abou.

Mormonnan ta hañando mas influensia sosial i polítiko na Merka ku nan miembronan destacando den CIA (Central Intelligence Agency), FBI (Federal Bureau of Investigation), forsanan armá, den tur nivel di gobernashon (stat, estado, nashonal) inkluso den senado, kongreso, i gabinete. E atministrashon di e èks-presidente merikano, Ronald Reagan, a empleá mas mormon ku kualke otro atministrashon anterior.

Pero e imágen positivo di mormonnan ta solamente un banda di e medaya. Mayoria mormon ta kompletamente ignorante di nan historia desagradabel i nan doktrina destruktivo. E echunan aki ku lídernan i historiadónan mormon ke skonde den un skuridat etèrno ta loke nos ke opservá awor.

- 
- 1
  - 2
  - 3
  - 4
  - 5